

建寧縣志卷之十九

知縣潞水韓琮纂

理學

自吾道南來而理學之盛莫過於閩子朱子集諸儒大成講學武彝山中四方游學之士從之者如歸市及後僞學禁嚴士之繩趨尺步稍以儒自名者多屏伏邱壑而艷權慕勢者且顯悖師說阿附以取祿位建寧劉剛中獨毅然不易其操相與追隨而卒業焉俾其餘澤轉淑鄉里迄今邑之士夫皆知有劉剛中其人信乎士之欲顯名於世者非

建寧縣志

卷之十九

理學

一

附青雲之士烏能聲施於後世哉志理學

宋

劉剛中字德言嘗讀老莊荀楊之書有所得皆爲發明及游朱子之門剛中以所業請質朱子曰老莊書壞人心術自是篤志於道朱子易其字曰近仁與黃幹爲友既歸築室講學四方人士翕然從之薦於鄉登嘉定四年進士授漢陽簿調瀾溪丞卒文公子朱在爲狀其行邑士大夫舉祀鄉賢著有師友問答

第一條

剛中間先生曰義利之辨爲吾儒第一關頭學者講求有素所見非不分明及處事却又模糊何也先生曰底緣見不分明爾若分明如薰蕕觸鼻即聞旨否入口即覺曰然則嚮所見爲義者非義見爲利者非利乎曰此又何嘗不是只是見其大畧曰此是義此是利究竟幾微分際尙未甚黑白剛中曰幾微分際何在先生曰在公私間以公心出之利亦是義以私心出之義亦是利剛中曰若是公私在心義利在事心不應事事不應心奈何先生曰大學戒自欺求自慊知之眞行之力不待處分

其事一動念早自義利判然至於舍利取義已屬事後應迹剛中心喜稱快而退

第二條

剛中間爲學工夫須是有起端處人性之五常猶天運之五行迭相爲用循環無端初學復性從那一端下手先生曰始條理者智之事也人而智則見理明恁地欲爲仁便認真有箇仁欲爲義便認真有箇義欲爲禮便認真有箇禮欲爲信便認真有箇信因物索照審端用力知得去向自不迷於所徃易言曰體仁足以長人利物足以和義嘉會足

以合禮貞固足以幹事仁義禮信而不及智者智居乎其先也

第三條

剛中間大學一書包孕聖功王道何以云初學入德之門先生曰凡人居處有門必先有路識得路方到得門到得門方升得堂入得室大學綱領條目是門也本末先後是路也格致誠正修齊治平是堂也明新至善是室也初學便學論語望洋向若無有涯涘何如大學循途歷級從容馴至扶進高深若不得其門而入將俛俛乎其何之

第四條

剛中間先生曰人不學不知道學在讀書上見道在行事上見必讀書然後可行事歟先生曰固也然學即學其道非作兩截無論讀書無論行事恁地皆是道恁地皆是學果於經史典籍潛心玩索日用云爲細意體察自能窮天下之理致吾心之知豈談空說有之謂道鈎深索隱之謂學哉

第五條

剛中間大學八工夫必先致知致知在格物敢請物是恁底物先生曰此說程伊川言之甚善所謂格

物者窮經應事尚論古人之屬無非用力之地若
舍此平易顯明之功而必搜索于無形無迹之境
當前物理反不能靡所遺矣

第六條

剛中間程伊川涵養須是敬進學則在致知主敬致
知殆亦非兩截事歟先生曰主敬則心靜致知則
理明心靜理明知以涵養而益深沉然敬非終日
危坐游心淡泊必有事焉神不外馳而說心研慮
時時有新得也

第七條

建寧縣志

卷之十九

理學

四

劉剛中間於黃直卿曰先生學有淵源群弟子皆知
之矣比以古昔聖賢未審到得何人地位直卿曰
自洙泗以還博文約禮兩極其至者先生一人而
已然則先生之學其踵孔顏乎直卿曰然

第八條

先生居剛中侍先生語剛中曰子來從吾遊也誰使
之剛中避席前跽曰曾王父河南開封府君使之
也府君官開封府尹南渡力阻講和不得每恨不
能雪耻報讐歸隱墨田雲峰山下易簣囑後人曰
聞自楊龜山倡道東南進而益上超群儒而集大

成其在朱韋齋公子沈郎乎爾輩可往而就學剛中爲誦府君述懷詩曰撫心有恨辜君國學道無成愧子孫先生嗟嘆不已

第九條

剛中每見善人縱極愛敬不過當面則然見不善人雖其人久不在猶作十日惡自知性情之偏不知何以克治使嫉惡之嚴移而之好善之篤先生曰人心本自有善故投之以善則順人心本自無惡故投之以惡則逆順受易忘逆受難制其勢然也要惟是爾學問工夫未到率其本然未免過於忿

激若能以冲和者養成氣質漸漸消融結習自然寬厚平夷好善惡惡各適如其分量而止而偏私悉化德器亦自此深醇

第十條

剛中間程伊川粹然大儒何故使蘇東坡竟疑其奸先生曰伊川繩趨矩步子瞻脫岸破崖氣盛心粗知德者鮮夫子所以致嘆夫由也

第十一條

剛中間東坡何如人先生曰天情放逸全不從性體上打點氣象上理會喜怒哀樂發之以嬉笑怒罵

要不至悍然無忌其大體段尙自好耳放飯流歎而問無齒決吾於東坡宜若無罪焉

第十二條

剛中又問黃魯直何如人先生曰孝友行瑰瑋文篤謹人也觀其贊稱周茂叔光風霽月非煞有學問不能見及此四字非煞有功夫亦不能說出此四字

第十三條

剛中問周子主靜程子主敬二說各願聞其大概先生曰屏思慮絕紛擾靜也正衣冠尊瞻視敬也致靜以虛致敬以實然此中皆有誠實功夫豈摸形捉影而得周子靜則禮先樂後程子敬則自然和樂和樂禮樂非爾所及但時時收斂將此身心攝入靜敬中正心誠意久之自有進步處

第十四條

剛中問張子西銘與墨子兼愛奚以異先生曰異以理一分殊一者一本殊者萬殊脉絡流通直從乾坤父母源頭上聯貫出來其後支分派別井井有條隱然子思盡其性盡人性盡物性孟子親親而仁民仁民而愛物微旨非如夷之愛無差等且理

一體也分殊用也墨子兼愛只在用上施行如後之釋氏人我平等親疎平等一味慈悲彼不知分之殊又烏知理之一哉

第十五條

剛中日思尊聞行知奈一日之間聞而知之者分數多尊而行之者分數少因想子路有聞未之能行唯恐有聞直是學不得底先生曰天下事理有爲吾所合知合行者聞斯行諸可也如此事知其當如此行值事不我屬如何拿定要行若遇行事時苦於窒礙則又不可無知妄作或商以師友或證

以古今又何嘗不是尊所聞行所知

第十六條

剛中敢告先生某向年於衆情醇酢之地口雖不言私下一一對勘常覺得自家儘有好處別人儘有不好處今雖漸減亦時或微微有此意思先生厲聲曰是慝也是最不好如何反說自家儘有好處剛中慙然爲問曰先生何以教之先生曰攻其惡無攻人之惡非修慝與

第十七條

李方子黃直卿劉剛中侍坐先生左顧右盼已而徐

徐語剛中曰爾輩用功夫不要把合底事看得驚惶只當做日用飲食人生本應如此元初離不得有事勿正畧着一形象生一計較不急遽即惰慢忘助兩病症一時俱到矣

第十八條

剛中間先生曰讀其書想見其爲人不敏讀書時亦嘗掩卷沉吟思慕愛悅其人時時髭髯欲得見古人情狀究不我與何也先生莞爾而笑曰所謂想見者想見其爲人非想見其人也我不在古人地位亦不能到古人地位要其所以爲人處皆可師

法從容久坐如對古人須從古人行事上着意弹琴見文王十日得進實實地有神相契合奈何虛空摸擬將千年已朽之骨作旃檀佛像觀耶

第十九條

剛中退見李方子問曰先生作綱目愈於涑水通鑑殆法春秋以立綱法傳文以著目歟方子曰宏綱細目實本大學三綱領八條目所以規制盡善前此未有也

第二十條

剛中間太極極字不訓中當作何解先生曰原極之

所以得名蓋取諸樞極根極之義今天樞天根號北極義可通也太極者陰陽之樞紐萬物之根柢也蓋極也而太矣

第二十一條

剛中間程子言仁曰心譬如穀種生之性便是仁陽氣發處乃情也先生曰豈惟穀種凡菓實核內其中心皆曰仁

第二十二條

剛中又問醫家謂手足痺痿曰不仁其形象不與穀種菓核反對先生曰仁是性之生發流通者穀種

菓核能生發也手足痺痿不流通也

第二十三條

剛中間聖人垂訓教人務須委備詳盡先生獨不喜人繁瑣豈謂語言文字太多必至纏繞支離先生曰辭達而已矣即不纏繞支離苟不達累千萬句奚爲程夫子亦謂立言宜蘊藉含蓄毋使知德者厭無德者惑

附儒修

明

鄒大猷字徽卿號星臺以明經司訓松溪轉長沙益

陽教諭致仕歸講學授徒議論切實平居無惰容
教人無倦色學者稱曰鄒先生十舉賓筵卒祀鄉
賢

黃弼字君贊號印蘧幼時孝事繼母讓產與弟以歲
貢入北雍崇禎朝復積分之典考選以儲人才弼
名在副卷帝親拔置第六已而偕侄開先同舉北
闈授浙江太平知縣有政聲陞工部都水司郎中
致仕歸著有禮經解不存卒年九十餘門人稱曰
貞文先生

熊臣忠字亦良生平篤志潛修貞介自持有以二美

婢獻者却弗納又有以千金祈其請託當事出罪
者辭弗受與同邑諸生吳師聃友善共敦古誼會
試南歸卒于途康熙三十五年學使史公准入祀
鄉賢

涂尙志字觀五風岸孤峭外粥粥若無能及尙論古
人成敗天下事可否輒娓娓竟日未仕而卒

忠義

忠者不恤死義者不顧身此皆天性激發名教攸關第策名天府致身赴難猶爲迫於名分至若委巷編氓猝當禍難而能倡義率衆以遏寇虐保城池雖成敗不一要其趨忠効義有不可得而泯者志忠義

元

馮眞卿上黎人元季紅巾擾亂殘破郡縣人民離散卿募義勇戮力禦寇邑賴以安

明

建寧縣志

卷之十九 忠義

十一

陳 順赤下人

甯宗佩在城人

二人爲邑死難詳祀典黃度有傳載藝文

宋子建嘉靖間人自潮汀山寇憑陵肆毒於延邵撫建諸屬縣邑令吳金命建率鄉兵禦寇於寧化境外旋誅餘黨於赤上赤下不令殘孽復萌冬十月又戰賊於池下橋及三坑裏斬獲甚多寇焰乃熄